

BERBAKTI DI DESA

Pelajar dapat keluarga angkat menerusi program BASISKA



PENUNTUT merakam kenangan manis bersama keluarga angkat

Amri Mutalib
Gen.y@hmetro.com.my

Seramai 33 penuntut Kolej Rahim Kajai Universiti Kebangsaan Malaysia (UKM) mengikuti program Baktisiswa Sukarelawan Rahim Kajai (BASISKA) kali ke-8 di Kampung Teluk Wang besar, Sungai Petani, Kedah, baru-baru ini.

Ahli Majlis Perwakilan Pelajar (MPP), Shayuti Hasanuddin, 22, berkata program dijalankan bertujuan meningkatkan taraf sosial dan kebajikan masyarakat di kawasan luar bandar melalui aktiviti kepada penduduk.

Pada masa sama meningkatkan kesedaran dan memupuk semangat kesukarelawan penuntut untuk berkhidmat kepada masyarakat yang memerlukan terutama penduduk di luar bandar.

Program BASISKA yang dimulakan dengan pendedahan teknologi robotik (EDUBOTS) kepada murid darjah lima Sekolah Kebangsaan Teluk Wang Besar itu dirasmikan Prof Madya Dr Roslee Rajikan, selaku Pengarah Pusat Pembangunan Mahasiswa dan Alumni UKM.

Selain itu Majlis Penyerahan Anak Angkat membabitkan 16 keluarga angkat kepada penuntut

kolej.

Menurut Shayuti, program anak angkat ini menjadi medium terbaik untuk penuntut berinteraksi dengan penduduk yang dijadikan keluarga angkat di samping memberikan khidmat bakti.

"Dalam program yang berlangsung selama tiga hari itu, mereka (penuntut) boleh menikmati keunikan kehidupan penduduk yang juga petani selain menjalin hubungan ukhawah antara keluarga masing-masing," katanya.

Menyentuh mengenai pengalaman, Shayuti berkata kalau nak diikuti dia memang menyimpan hasrat memiliki keluarga angkat.

"Aktiviti yang dirancang selama ini adalah suatu titik permulaan kepada saya untuk bertemu keluarga angkat. Rasa tertarik untuk menyelami cara kehidupan penduduk kampung.

"Saya anggap mereka begitu istimewa dalam hidup sama seperti keluarga sendiri. Memang pada mulanya agak janggal berhadapan dengan orang yang tidak pernah kita kenali.

"Benarlah kata orang, tak kenal maka tak cinta. Itulah yang terjadi dalam hidup saya. Kini saya semakin serasi dengan keluarga



AMALAN bergotong-royong memeriahkan program.

angkat kerana mereka melayan seperti keluarga sendiri," katanya.

Program dimeriahkan lagi apabila penuntut didedahkan aktiviti sukan rakyat di tengah sawah padi.

Mereka berpeluang merasai pengalaman turun ke sawah di samping mengukuhkan semangat kerjasama berpasukan.

Setiausaha Jawatankuasa Kemajuan dan Keselamatan Kampung (JKKK) Ibrahim Aakashah berkata program ini diharapkan mewujudkan hubungan yang akrab antara penuntut serta penduduk dalam suasana santai dan bersahaja.



PENGALAMAN berada di sawah padi mengeratkan hubungan.